

բաժնուած էին ընկերներէն . և այլ հինգն՝ պանդըխտութեան միջոց վախճանած... Ինն տարիէ վերջը 1685ին, Հրաշագործ պատկերը Իլվովի մայր եկեղեցւոյ մէջ կը գետեղեն, և Եղբայրութիւն մի կը հաստատեն Ս. Նիկողայոսի անուամբ: Եղբայրութեանս մատեանները կարգաւորեալ ձևով գրուած են և ցարդ կը պահուին եկեղեցւոյ դիւանին մէջ: Երբ Տաճիկ կառավարութիւնն ձեռքը կը քաշէ Կամիւնիցէ, Եղբայրութեանս հոգաբարձու քահանայք՝ Ոնոփրիոս Ասլանովիչ և Ստեփան Բարուքովիչ՝ կը բերեն Աստուածամօր պատկերը, 22 մայիսի 1700, մեծահանդէս թափօրով, և կը գետեղեն Ս. Ստեփանոս մատրան մէջ, զոր առ ժամանակեայ կը յարգարեն Ս. Նիկոլ եկեղեցւոյ դանգակատան ստորին յարկին մէջ. վասն զի նոյն ատեն Հայոց երկու եկեղեցիքն ևս աւեր վիճակի մէջ էին: Կը գտնուի նոր բարերար մի, Պոկտան Լատինովիչ, որ շուտով նորոգել կու տայ Աստուածամօր Աւետման մատուռը և կարևոր սպասները կը հայթայթէ: Աստ կը մնայ Տիրամօր Հրաշագործ պատկերը, մինչև որ նորոգի Աքանչեւագործ հայրապետին եկեղեցին 1767 »: « Յամի տեառն 1767, օրն 22 օգոստոսի, եղև բերումն թափօրով Հրաշագործ պատկերին երանուհւոյ կուսին, 'ի նոյն եկեղեցին. » կը ծանուցանէ հին ճաշոցին նոր յիշատակարանը . և այդ Ս. Նիկողայոս եկեղեցւոյն մէջ մինչև ցայսօր կը պաշտուի 'ի բազմախուռն ժողովրդոց Տիրամայրս Հայոց: Բաց 'ի սովորական ջերմեռանդութեանց և ութօրեայ Վերափոխման տօնին ցնծութեանց, տարւոյն մէջ բոլոր շաբաթօրերը նուիրեալ են Աստուածամօրս պաշտաման, և միշտ խուռն բազմութիւն կը ժողովի նոյն օրերը